

Saranan kepada media massa

Dr.M:Utamakan kepentingan rakyat, negara

KUALA LUMPUR, Innin — Datuk Seri Dr. Mahathir Mohamad malam ini menekankan, mustahaknya pihak media massa mengutamakan kepentingan rakyat dan negara dari kebebasan berakhbar.

"Sekiranya kita memikirkan tentang rakyat dan negara kita, kepentingan sempit akhbar sebagai sebuah institusi akan tidak menjadi begitu penting," lambahnya.

Perdana Menteri juga menekankan, pentingnya kebebasan berakhbar digunakan sebaik-baiknya dengan batasan dan penuh tanggungjawab.

Beliau yang mengukuhkan peranan media massa dalam membantu usaha-usaha kerajaan untuk membangun negara sebagai penting, bagaimanapun mengingatkan wartawan supaya menimbangkan perasaan rakyat berbilang kaum negara ini di dalam tugas harian mereka.

"Dalam masyarakat berbilang kaum ini, tanggungjawab pihak akhbar melebihi dari hanya ketepatan melapor.

"Kestabilan politik dan keamanan yang dikecapi bersama antara rakyat berbilang kaum negara ini merupakan dua perkara besar yang sedang diperjuangkan oleh kerajaan," tegasnya.

Datuk Seri Dr. Mahathir berkata demikian dalam ucapannya yang agak 'keras' di majlis makan malam anjuran Kelab Kebangsaan Wartawan-wartawan Malaysia di sini.

Beliau berkata, segala usaha kerajaan akan menjadi sia-sia sekiranya pihak akhbar keterlaluan sehingga membuat laporan tanpa menimbangkan perasaan setiap kaum di negara ini.

"Malaysia memerlukan jangka waktu kestabilan untuk memperkukuh kedudukannya.

"Kerajaan akan melakukan apa yang termampu. Tetapi kerajaan memerlukan kerjasama setiap orang, termasuk pihak akhbar.

"Anda telah melakukan tugas dengan baik sehingga ini, tetapi masih banyak harus dilakukan sebelum setiap orang di Malaysia dapat disatukan dengan objektif tunggal, membina Malaysia yang lebih besar, di mana keamanan dan kekayaan berserta kebebasan mereka yang bertanggungjawab terjamin," ujarnya lagi.

Datuk Seri Dr. Mahathir selanjutnya menasihatkan wartawan supaya menjadikan segala batasan yang dikenakan sama ada oleh kerajaan, tuan punya, pengiklan atau majikan sebagai cabaran kepada kedewasaan pemikiran mereka.

"Saya sendiri tidak percaya yang kebebasan akhbar secara mutlak wujud di mana-mana, walaupun di negara-negara barat yang liberal," ujarnya.

Perdana Menteri menisfikatkannya sebagai suatu metos yang direka oleh mereka yang dikatakan sebagai orang barat yang liberal untuk kepentingan mereka.

"Mereka menguasai sebahagian besar dari media di dunia dan tentunya merupakan orang yang paling beruntung sekiranya kebebasan berakhbar benar-benar wujud.

"Akhbar kita tidak seharusnya mencontohi kebebasan seperti itu, apatah lagi terlibat dalam tindak-tanduk 'hegemoni intelektual' mereka yang halus.

"Kita harus memikirkan tentang apa yang baik bagi negara dan rakyat kita pada keseluruhannya," tegasnya lagi.

Datuk Seri Dr. Mahathir yang pernah diharam mengedar pendapatnya melalui tulisannya dan faham betapa tinggi nilainya peranan media percaya kehilangan sedikit kebebasan untuk seorang individu tidak begitu merugikan sekiranya dibandingkan dengan kepentingan sebuah negara.

Perdana Menteri ketika menyelar laporan-laporan sensasi berkata: "Walaupun media massa mempunyai hak untuk mendedahkan sebarang kegagalan, sama ada di dalam kerajaan atau di sektor swasta, ia juga bertanggungjawab untuk melakukannya secara adil, seimbang.

"Kita tidak harus melupakan kejayaan dan kecapaian. Sekiranya laporan anda tidak seimbang, anda akan gagal menjalankan tugas penting anda memberi maklumat kepada orang ramai."

Kegagalan mempertahankan laporan seimbang, menurutnya, akan mengakibatkan imej negara seakan gagal untuk menjayakan sebarang usaha.

"Dalam negara dan terutamanya di luar, perkataan saya selalu diputarbelitkan untuk kepentingan sesebuah penerbitan, yang selalunya dimaksudkan untuk memperkenalkan dan memperluas pendedaran akhbar berkenaan.

"Baru-baru ini, saya menerima panggilan telefon dari BBC London menanyakan saya tentang dasar kerajaan mengenai pembekal British.

"Saya enggan menjawabnya kerana saya tahu apa-apa yang saya perkatakan akan digunakan menentang saya dan Malaysia," jelasnya.

Bahan asal dari Arkib
Negara Malaysia